

## PUO YA BOPHATLALATSI BA DITABA KA SARS MABAPI LE TABA YA CRRC

**Tshwane, 21 Phupu 2022** – Ditshebeletso tsa Lekgetho tsa Afrika Borwa (SARS) di ananela kahlolo e dihilweng ke Lekgotla le Phahameng la North Gauteng ya ho qhelela ka thoko kopo ya Chinese Railway Rolling Stock Corporation (CRRC) ya hore SARS e kgutlise tjehelete e nkuweng akhaontong ya yona ho latela dintlha tsa ho kgethwa ha mekga ya boraro tlasa karolo ya 179(6) ya Molao wa Taolo ya Lekgetho wa 28 wa 2011 jwalo ka karolo ya maiteko a SARS a ho bokella makgetho ohle a salletseng morao.

Karolo ya 179 ya Molao wa Taolo ya Lekgetho e neha SARS matla a ho bokella lekgetho le morao la molefalekgetho ho tswa ho mokga wa boraro. Karolo ya 179(6) e neha SARS matla a ho etsa jwalo ntle le ho ntshetsa molefalekgetho eo lengolo la tseko bakeng sa sekoloto seo sa lekgetho ebang ho ntshuwa ha lengolo leo ho ka thunthetsa ho bokellwa ha sekoloto seo.

Kahlolo ena e dumellanang le SARS e sireletsa matla a molao a SARS a ho sebedisa karolo ena ya 179(6) ho bokella makgetho a morao mme ke tlhola e kgolo ha ho lekolwa maiteko a ntse a tswela pele a SARS a boikobelo, haholoholo ha re sheba maemo a seng matle a ikonomi a renang ha jwale.

Boitshwaro bona ba ho se ikobele tefo ya lekgetho ka balefalekgetho bo nonyetsa mehlodi ya sebele ya Mmuso mme sena se beha ka mosing Mmuso le setjhaba sa Afrika Borwa se tshepotseng ho fumana ditshebeletso tsena tsa motheo ho tswa ho mmuso. SARS e tla tswela pele ho phethahatsa thomo ya yona ya ho bokella lekgetho lohle le kolotuwang, ntle le tshabo, leeme kapa ka tsela e inkelang diqeto.

Khomeshenara ya SARS Mong. Edward Kieswetter o thoholeditse SARS ka ho ba matjato ho bokella makgetho a neng a hlokwa ke mokotla wa naha. O itse "tiehiso efe kapa efe ya ho potlakela taba ena ekabe e bakile hore matlole ana a fetisetswe mose, mme sena se ne se tla etsa hore sekoloto sena se kolotuwang SARS ho be boima haholo hore se boele se leshwe hape. Ho feta moo, sena se pakahatsa hore SARS e tseleng e nepahetseng ya ho ntlafatsa bokgoni ba yona ba ho thibela boitshwaro ba ho se ikobele tefo ya lekgetho le maikutlo a tsamaisang le sena a ho se kgathalle ka ba bang ba itseng ba balefalekgetho. Ena ke tlhola e kgolohadi bakeng sa mokgatlo le baahi ba naha ya rona."

Khomishenara o phethetse ka hore "SARS e ikemiseditse ka hohlehohle ho sebetsa mmoho le diakgente tse ding tsa molao ho sala morao dikgothaletso tsa Khomeshene ya Zondo ditabeng tse welang tlasa moralo wa tshebetso wa molao o laolang tsa lekgetho naheng ena. Maikemisetso ana a ho sebetsa ka katamelo le diakgente tse amehang a supa maikemisetso a SARS a ho se lobe letho ho sala morao bao ba bileng le seabo Kgapong ya Mmuso moo ho bileng le ditlolo tsa molao tsa lekgetho teng".

Ho fumana lesedi le fetang lena, ka kopo ikopanye le [SARSMEDIA@sars.gov.za](mailto:SARSMEDIA@sars.gov.za)